

թերի եւ առանց պատճառի: Գրուեցաւ ի աշխարհն Վասպուրականի*): եւայլն (ԺԵ):

Ներկայացուցիչների ժողովը կամ պարլամենտը միապալատեան է: Նա ոչ միայն երկրի բարձրագոյն օրէնսդիր հիմնարկութիւնն է, այլ եւ — ինչպէս յիշեցինք — բովանդակ իշխանութեան աղբիւրը: Նրանից են բղխում եւ վարչական, եւ դատական, եւ զինուորական իշխանութիւնները: Ուրիշ խօսքով՝ վեհապետ ժողովուրդը, յանձին իր այդ գերագոյն մարմնի, վեհապետօրէն կարգադրում է երկրի ճակատագիրը:

Սրանից էլ բղխում է այն անսահման հեղինակութիւնը, որ ունի հայոց տունը Շահամիրեանի աչքում: Նրա օրէնքներն ու կարգադրութիւնները անսպաժան են, կամ ինչպէս ինքն է ասում՝ «Հայոց թագաւոր» (ՄԼԵ): Ոչ ոք, ոչ մի իշխանութիւն կամ անձնաւորութիւն, չի կարող դէմ դնալ կամ չհնազանդել հայոց տանը: Դա կը լինէր ըմբոստութիւն կամ անհնազանդութիւն աղբիւր հանդէպ, — մի բան, որ մեր հեղինակի համար աներեւակայելի է: Անհնազանդը, թէկուզ ամենաբարձր պաշտօնեան պետութեան մէջ, անմիջապէս հեռացւում է պաշտօնից, չլթալուծւում-տարւում է բանտ եւ իր յանդուութեան համար խտօրէն պատժւում դատարանով, անգամ մահուան պատիժ ընդունելով (նձգ): Իսկ նա, ով կը համարձակ ունի «ապստամբել ընդդէմ տանն եւ օրինացն հայոց», ինքը իր համակիցներով «մահու մեռցի եւ որդիք նոցա մի՛ մոցէ ոչ ոք պաշտօն իշխանութեան մինչեւ եօթ ցեղն սերնդոց» (նձգ):

Դժբախտաբար, հեղինակը պարզ կերպով չի պատկերացնում իրան Հայաստանի այդ բարձրագոյն հիմնարկութեան ներքին կազմակերպութիւնն ու գործունէութիւնները — եթէ չասենք որ բաւական աղօտ դադարաւոր ունի

նրանց մասին: Օրինակի համար, մենք չգիտենք, թէ ո՞վ եւ ի՞նչպէս է բաց անում պարլամենտը), ո՞վ է ղեկավարում նրա նիստերն ու աշխատանքները, ի՞նչ ձեւով է տարւում գործավարութիւնը, ո՞վ է նրա նախագահը: Չգիտենք նստաշրջաններով է կատարւում նա իր աշխատանքները, թէ՞ իր տեղովութեան ընթացքում միշտ բաց է եւ գործում է: Միայն մի անորոշ օրէնք գոյութիւն ունի այդ մասին, թէ ամէն տարի եւ ամէն ժամանակ կարելի է օրէնք դնել (վլա): Ուստի մեզ մնում է յաճախ դիմել ենթադրութիւններին կամ հնարաւորութիւններին օգնութեանը եւ նրանով ինքիւրները պարզաբանել:

Որովհետեւ բոլոր կարեւոր պետական պաշտօնները — անգամ զօրքի մէջ սպարապետից սկսած մինչեւ հազարապետը — ընտրւում են ազգային ժողովում եւ նրա անդամներից, կը նշանակի պատգամաւորներին մի խոշոր մասը, պաշտօնի բերումով, ցրուած պիտի լինի զանազան քաղաքներում եւ վայրերում, այդպիսով չկարողանալով մասնակցել պարլամենտի նիստերին ու աշխատանքներին: Այդ իսկ պատճառով պարլամենտի ամենաառաջին գործն է՝ ընտրել պատգամաւորներին կէսը, այսինքն՝ իւրաքանչիւր երկու «փոխանորդ»-ից մէկ- մէկ հոգի պարլամենտական միայուն աշխատանքների եւ օրէնսդրութեան համար (մդ, մք, խգ):

Սրանց ընտրութեան ձեւի մասին որեւէ ցուցմունք օրէնքների մէջ չենք գտնում: Ենթադրելի է սակայն, որ վիճակահանութեամբ պիտի լինի, որովհետեւ Շահամիրեանի սիրած ընտրական եղանակը վիճակահանութիւնն է: Պաշտօնների համար ընտրուած պատգամաւորները կոչւում են «ի պաշտօն իշխանութեան» ընտրուած կամ «պաշտօնատար ի տանէ հայոց», իսկ պարլամենտական միայուն աշխատանքների համար ընտրուածները՝ «ի կարգ տանուտէրութեան» կամ «տանուտէր» (մդ):

Երկու կարգի տանուտէրեր ունի հեղինակը. վերոյիշեալ սովորական տանուտէրերից

*) Ինչպէս տեսնում էք, Կարբի եւ Եղուարդ գիւղերը, որ Այրարատի մէջ են, հեղինակը դրել է Վասպուրականում. դա պէտք է բացատրել կամ նրանով, որ նա լաւ չգիտէ Հայաստանի աշխարհագրութիւնը եւ կամ, որ իւրաքանչիւր հայ ընտրութիւններին մասնակցում է այն դաւառում, ուր նա ապրում է կամ գտնւում ընտրութիւնների ժամանակ:

1) Շահամիրեանի «Տուն Հայոց»-ի համար մենք երբեմն գործ ենք ածում, «պարլամենտ» եւ «ազգ. ժողով» արտայայտութիւնները: